

Zürich, 24. Juni 1575

Von Josias Simler

UB Basel, G I 26, Nr. 68; Abschrift: G² I 29a, fol. 118r-v.

S. Nihil mihi hoc tempore iucundius accidere potuit tuis literis uir clarissime, tum quod te summum uirum inter grauissimas occupationes mei memoriam non abieceris video, tum etiam quod me eo honore afficeris uoluisti ut iudicium et publicationem epistolarum optimi mei praeceptoris et amici sanctae memoriae, ad me deferre statueris. Ego uero etsi nihil iudicij habeo in rebus medicis, tamen studium et labore meum offero in his edendis, quibus tamen uelim coniungi alias quoque Gesneri epistolas quae aliquid philosophicum et scitu dignum continent, quales et apud CL[arissimum] medicum Caesareum D. Cratonem inuenientur (ad quem de hac re per amicos scribi curauit) et apud nonnullos alios cum Italos tum Germanos. Neque ita dudum est quod de hac re cum D. Thaddeo Duno medico Italo uerba feci, ut autem idem accuratius agam tuae me excitarunt literae. Multum debeo Gesnero meo, quare laetor mihi occasionem aliquam offerri testandi studium et obseruantiam meam in sancte colunda ueteris et demortui amici memoria. Velim quidem Gasparum Wolphium qui bibliothecam eius possidet, monumenta quaedam doctrinae illius, qualia non pauca habet, in publicum edere, sed quia ille procrastinatione quadam in his utitur, uel propter negotia, uel quod non tam ut Gesnerus laboriosus sit, spero cum meam tum aliorum in simili studio operam studiosis non ingratam fore. Porro quod tam tarde literis tuis respondeo cupio me tibi excusatum esse, nam tuas quae datae sunt XII Cal[endas] Aprilis heri demum XXIII Iunij accepi, idque testabitur literis suis Felix Kererus affinis CL[arissimi] V[iri] D. Achillis Gassari. D. D. Occonem plurimum saluere cupio, cui scripsisse si per nuncij festinationem licuisset. Vale V[ir] CL[arissime]. Tiguri XXIIII Iunij 1575.

Tui obseruantissimus
Iosias Simlerus.